

Fokusiranjem na razvoj i borbu protiv korupcije, Brčko će održati pozitivan zamah



Prvi zamjenik visokog predstavnika i supervizor za Brčko Distrikt Jonathan Mennuti u srijedu je posjetio Luku u Brčkom i sastao se sa direktorom Luke i šefom Jedinice za implementaciju projekta modernizacije Luke. Supervizor je još jednom podvukao značaj ovog projekta za unapređenje ekonomskih prilika u Brčkom i njegove pozicije regionalnog transportnog čvorišta.

Građani Brčkog bi na proljeće već trebali vidjeti dolazak i montažu nove dizalice, što će značajno unaprijediti kapacitete Luke. Sa završetkom izgradnje novih željezničkih i cestovnih priključaka, za koje je u toku postupak izdavanja potrebnih dozvola, i sa predstojećom reformom korporativnog upravljanja, ovo će uveliko unaprijediti konkurentnost Luke na bosanskohercegovačkom i regionalnom tržištu.

Supervizor je također posjetio i Ured za borbu protiv korupcije u Distriktu i sastao se sa direktorom Ureda i njegovim zamjenicima. Korupcija je i dalje jedan od ključnih izazova u Brčkom i glavni je motiv odlaska mladih ljudi. U tom pogledu, supervizor je naglasio potrebu za što boljom saradnjom između institucija za provođenje zakona kad je u pitanju politika nulte tolerancije prema korupciji u Distriktu.

Nastavljajući svoje redovne konsultacije sa zvaničnicima Distrikta, supervizor se sastao sa gradonačelnikom Distrikta, zamjenikom gradonačelnika, predsjednikom i zamjenikom predsjednika Skupštine Distrikta, gdje je informiran o radu institucija u vezi sa tekućom reformom uprave i inicijativama za razvoj infrastrukture.

Načelnik policije Brčko Distrikta informirao je supervizora o naporima koji se ulažu na očuvanju sigurnog okruženja za predstojeće praznike. Šef policije i supervizor su se složili da postoji potreba za tijesnom saradnjom i koordinacijom u tom smislu između svih agencija za provedbu zakona i organa vlasti u Brčko Distriktu.

Odlučna opredijeljenost za reforme, efikasna provedba infrastrukturnih projekata u dogovorenim rokovima i čvrst stav protiv korupcije pomoći će da se održi uspješan zamah koji sada postoji u Brčkom. Promjene i napredak su mogući, ali jedino ako organi vlasti zadrže fokus na svojim dužnostima i obavezama prema ovoj zajednici i njenom prosperitetu, rekao je supervizor Mennuti.